

**Hepatitis B-mut akiuussutissamik nunatsinni meeqqat akiuussutissanut allanut kapitit-tarnerannut ilanngullugu kapitittalernissaannik Naalakkersuisut suliniuteqaqqullugit peqquneqarnissaannik aalajangiiffigisassatut siunnersuut**  
(Inatsisartunut ilaasortaq Olga P. Berthelsen, Inuit Ataqatigiit)

**Akissuteqaat**

(Peqqissutsimut Naalakkersuisoq Agathe Fontain)

**Aappassaaneerneqarnera**

Peqqissutsimut Ataatsimiititaliap isumaliutissiissummini novemberip ulluisa qulinganni 2009-meersumi aalajangiiffigisassatut siunnersuut pinaveersaartitsinermit iliutsinut maanna ingerlanneqareersunut naapertuuttut isumaqarfigaa, kiisalu siunissaq ungasinnerusoq eqqarsaatigalugu pinaveersaartitsinermit ingerlatat peqqinnissaqarfimmi ukiumi kingullerni aningaasartuutitut annertusiartuinnarsimasunut annikillisaaqataasinnaassatut.

Qinigaaffimmi matumani nassuiaammik iliuusissatut pilersaarummik ilalimmik malitseqartitsinissaq Peqqissutsimut Ataatsimiititaliap periarfissaq iluatsillugu inassutigaa. Tassa imaappoq, akiuussutissamik kapuineq nappaatinik qulaani pineqartunik ikilisitsinermik siunertamisut sunniuteqarsimansoq, taamaasillunilu sunniutit iliutsillu kingusinnerusukkut politikikkut peqqinnissaqarfiullu iluani sulinermit atatillugu kiisalu pisariaqartitsineq naapertorlugu atorneqarsinnaasunngorlugit.

Allannguutit taakkua nalilersorneqartariaqarnerannik Peqqissutsimut Ataatsimiititaliap isumaa Naalakkersuisut isumaqatigilluinnarpaat.

Hepatitis B-mut pneumokokinullu akiuussutissamik kapuisarnermik atuutilersitsiniarneq, iliutsillu nalilersorneqarnissaannik Peqqissutsimut Ataatsimiititaliap isumaa Naalakkersuisut isumaqatigaat.

Naalakkersuisulli tassunga ilutigitillugu maluginiaqqussavaat akiuussutissamik kapuinermit atatillugu naliliinerup qinigaaffiup matuma ingerlanerani pisinnaanissaa naatsorsuutigineqarsinnaanngimmat, kapuinissamik pilersaarutip atuutilersinneqarnissaa aatsaat 2010-mi naatsorsuutigineqarsinnaammat.

Pneumokokinut akiuussutissamik kapuinermit naliliineq aatsaat pisinnaavoq paasissutissat ukiumi marlussunni katersorneqareernerisigut, hepatitis B-mullu kapuinermit tunngatillugu akiuussutissamik kapineqarsimasut aatsaat inersimasunngoreerpata sunniutaata takussutissartaqarlernissaa naatsorsuutigineqarsinnaavoq.